

PROFESORI, STUDENTI I UČENICI SŠC „GEMIT-APEIRON“ U PASOŠU KOMPETENCIJA



Pasoš kompetencija – vodič kroz život i poslovni put

Uz pomoć Centra za vođenje karijere Univerziteta „Apeiron“ devet studenata Kluba naprednih studenata, profesori i učenici SŠC „Gemit-Apeiron“ u narednih mjesec dana popuniće „Pasoš kompetencija“. Kroz individualni rad sa mentorima opisće vještine, sposobnosti i kompetencije koje su pored formalnog obrazovanja na fakultetu stekli neformalnim i informalnim obrazovanjem - učestvujući u raznim akcijama, baveći se hobijima, volontirajući i sl.

„Svi čije se kompetencije i sposobnosti nađu u ovom poznatom dokumentu koji se koristi u razvijenim evropskim zemljama, dobijaju velike šanse da ih poslodavci prepoznaju“, istakla je Elvedina Tatarević iz Centra za vođenje karijere. Dodala je i to da mnogi kandidati koji su već popunili Pasoš, nisu bili ni svjesni svih svojih kvaliteta koji su potrebni u poslovnom svijetu, a koje su otkrili odgovarajući na pitanja u pojedinim odjeljcima.

Pasoš kompetencija u BiH uveden je u okviru projekta „**Podrška obrazovanju odraslih**“, njemačke vladine organizacije GIZ.

Bosanskohercegovački Pasoš kompetencija je adaptirana verzija njemačkog ProfilPASS-a (Pasoša profila), koji je razvijen od strane Njemačkog instituta za obrazovanje odraslih (DIE) i Instituta za razvojno planiranje i strukturno istraživanje (ies). O vrijednosti i priznatosti ovog instrumenta, dovoljno govori činjenica, da menadžmenti vodećih kompanija u Njemačkoj, svoje zaposlenike biraju na osnovu kompetencija navedenih u Pasošu kompetencija, te da njihovi radnici imaju popunjeno Pasoš kompetencija.

Podsjetimo da je krajem 2012. godine, na prijedlog Evropske komisije, izdata preporuka Savjeta Evropske unije o validiranju neformalnog i informalnog učenja. „Ljudi uče i razvijaju svoje kompetencije u svim djelatnostima i svim oblastima unutar kojih se angažuju. Za ono što se nauči u školi, tokom stručnog usavršavanja i djelovanja postoje svjedočanstva koja dokumentuju i vrednuju naučeno. No, i u drugim oblastima djelovanja stiču se kompetencije, ali za to se ne dobivaju nikakvi sertifikati, svjedočanstva ili diplome“, ističu iz GIZ-a.

Instrument „Pasoš kompetencija“ služi za dokumentovanje sposobnosti, vještina i kompetencija koje se stiču tokom školovanja, rada, obavljanja neke volonterske djelatnosti, ili baveći se hobijem te obavljajući svakodnevne poslove i dužnosti unutar porodice.

Svi studenti Panevropskog univerziteta „APEIRON“ i učenici SŠC „Gemit-Apeiron“ koji su zainteresovani da „otkriju“ kojim to sposobnostima, kompetencijama i vještinama još raspolažu mogu da kroz individualno savjetovanje u Centru za vođenje karijere urade svoj Pasoš kompetencija i na taj način postanu konkurentniji na tržištu rada.